

Segun Tico Croes, miembro di fraccion di AVP

Ministro Nicolaas ta sink Aruba

ORANJESTAD(AAN)- Sr. Tico Croes, miembro di fraccion di AVP a bisa cu un par di siman pasa Ministro di Trafico y Comunicacion y tambe Ministro di Husticia (ora cu Ministro Croes ta ausente), sr. Elio Nicolaas, tabatin e gran idea di duna un declaracion publico cu economia di Aruba ta basa ariba traficacion di droga, labamento di placa y droga y solamente na di tres lugar turismo. Ta importante pa señala cu casi 70% di e fuerza laboral den forma directo of indirecto ta den turismo.

Den declaracionan despues segun sr. Tico Croes, Ministro Nicolaas a keda insisti ariba locual el a bisa y den mesun rosea a lastra cu e institucionnan manera Banco Central y e Procurador General. Ministro Nicolaas a tilda tur dos institucionnan aki di complaciente cu e pais ta un pais di droga sin cu nan ta haci nada al respeto.

E criticanan na AVP, Procurador General y Banco Central ta afectando profundamente e credibilidad di e dos institucionnan aki, pasobra Nicolaas no a papia como ciudadano pero den su funcion como Ministro di Aruba y Gabinete Oduber. Ademas atacando Procurador General, Ministro Nicolaas ta atacando e curazon di un di e institucionnan mas importante di e existencia como pais democratico.

Sr. Croes a sigui bisa cu e declaracion di Ministro Nicolaas a causa hopi consternacion den comunidad pasobra Ministro Nicolaas a keda di trece evidencia cu lo por hustifica un declaracion di un evergadura asina y cu a daña den forma irreparable e bon number y reputacion di Aruba.

Te ainda AVP no por compronde kico exactamente Ministro Nicolaas kier logra cu un declaracion cu segun Banco Central y segun AVP ta totalmente infunda, pasobra no tin nada cu ta muestra cu Aruba su economia ta basa ariba droga; pasobra ta esey loke Ministro Nicolaas a bisa, esta cu Aruba su economia ta basa ariba traficacion di droga, labamento di placa di droga y solamente na di tres lugar turismo.

Ta solamente for di un mente maligno of for di un ignorancia grandi por sali un declaracion asina, Sr. Tico Croes a enfatiza, pasobra loke e ta haciendo ta cabando cu y ofendiendo su mesun pueblo, dunando su mesun pueblo un imagen y reputacion cu nan no tin y cu no merece tampoco. E declaracion di sr. Nicolaas mester worde mira como un culminacion di un politica di calumnia, sushamento di number di hende y redashi cu tabata dirigi contra Partido di Pueblo Arubano, pero cu na caminda a cumenza poco-poco ta cabando cu Aruba.

Pa Sr. Croes ta parece cu ki ora no tin argumento mas pa defende nan punto di bista, nan ta cay den sushamento di number di hende, insulta hende y calumnia e institucionnan democratico pa salba nan mes. E ambiente aki di susha ken su number cu nan kier ta posible pasobra nan tin e sosten di gobierno di Oduber toch. Nan a yama AVP mes narco-complaciente, nan a haci bofon di tur loke Gabinete Eman den forma serio a haci den e lucha internacional contra droga, nan a acusa nan mesun hendenan di ta den droga sin trece evidencia y prueba.

Awor den gobierno nobo di Oduber nan mes ta acusando otro y cu si den e tempo cu nan tabata den oposicion tabata spiertanan cu nan tabata haci Aruba daño, awor cu nan ta den gobierno ta peor nan ta haci pa Aruba. Den nan odio y sed di destruccion nan a lubida cu ta un Aruba so tin; no tin un Aruba berde, geel, oranje of blauw. Ta tur ta forma un

Aruba y ora cu den un forma inhusto acusa y ofende e pueblo di Aruba, di ta tolera cu su economia ta basa ariba traficacion di droga, labamento di placa di droga y solamente na di tres lugar turismo, ta un mesa so e por tin: caba, destrui tur loke tin, e kier sink Aruba, Sr. Tico Croes a termina bisando.